
Sarajevo, 11.05.2021. godine

Skupština Kantona Sarajevo
N/r ministrici Muminović Hota

INICIJATIVA

Podnosim inicijativu prema Ministarstvu za predškolski, osnovni i srednjoškolski odgoj i obrazovanje KS da razmotri uvođenje kontrolnog mehanizma nad radom privatnih vrtića u KS, koje bi djelovalo direktno pri resornom ministarstvu te da donese Odluku o zabrani mijenjanja/podizanja mjesečne cijene za boravak djece koja su već upisana u privatne vrtiće u KS, čije roditelje subvencionira Vlada KS. Naglo podizanje cijena ne bi smjelo biti prihvatljivo u vremenu pandemije i ekonomske krize.

Obrazloženje

Subvencija je vid materijalne podrške roditeljima, koja je odobrena od strane Vlade KS prije dvije godine, a djeca koja se nisu uspjela upisati u javni vrtić zbog nedostatka mjesta su upisana u privatne vrtiće. Iako privatni vrtići djeluju po istim zakonskim propisima, ipak nedostaje (snažnija) kontrola nadležnog ministarstva. To rezultira samovoljom vlasnika/ca vrtića i ogleda se u konstantnom mijenjanju uslova rada u skladu sa vlastitim interesima, ne vodeći nužno računa o interesu djece. Iako postoji inspekcija kao i nadzorno tijelo koje ima funkciju Vijeća roditelja privatnih vrtića, njihova kontrola je nedovoljna. Stoga tražim da se ministarstvo intenzivnije uključi u nadzor rada i djelovanja privatnih vrtića. Inspekcije ne mogu pokriti sve aspekte djelovanja vrtića, a Vijeće roditelja privatnih vrtića je, čini se, samo mrtvo slovo na papiru. Osim što roditelji nemaju otvoren kanal komuniciranja sa tim tijelom, nisu obaviješteni o njegovom djelokrugu, a i sam izbor predstavnika ne nudi fer i transparentan sistem kandidovanja glasanja i imenovanja, što dovodi u sumnju legitimitet takvog postupka, te se postavlja pitanje da li je to planski urađeno kako bi se kao predstavnici roditelja imenovale osobe bliske vlasnicima/ama vrtića? Neophodno je uvesti kontrolu Ugovora koji se roditeljima daju na potpis, a koji se mijenjaju svake godine i pod uslovima koji su u isključivom interesu vrtića (ne djece ili roditelja). Ugovori bi morali biti u najvećoj mjeri standardizirani, kako bi se podigao kvalitet pravnog odnosa vrtića i roditelja. S time bi se zaustavila manipulacija cijenama i zaustavilo nepravedno oduzimanje dijela novčanog iznosa vrtićima, a kojeg je Vlada KS kroz sufinansiranje omogućila kao podršku roditeljima. Stoga, zbog veće javnosti i transparentnosti rada privatnih vrtića tražim da ministarstvo razmotri uvođenje veće kontrole rada privatnih vrtića, mimo inspeksijskog nadzora, te da nadgleda Ugovore koji roditeljima na potpis daju privatni vrtići u KS.

Prof. dr. Jasna Duraković

Zastupnica SDP BiH